

An den Leser.

In diesem Buch hab ich folgende Puncten tractiren wollen.

1.

Zum Ersten mit dem Anfang dieses Buchs hab ich alle Geschlechter der Himlischen Circel vnd Linien der Vorder vnd Hinderseyten / des Astrolabij, jede Seyte in dreyen vnterschiedlichen Theilen / außführlich vnd gründlich erkläret.

Im ersten Theil der Vorderseyten wird gehandelt von dem Limbo Horario, Im andern Theil von der Mater des Astrolabij, vnd der Landtaffeln so darin geleeget/darinnen alle Geschlecht der Himlischen Circel außführlich erkläret werden.

Im dritten Theil wird von dem Rete vnd seinen Circeln dem Zodiaco vnd AEquatore, wie auch von dem Stellis fixis so darein gesetzt/sampt der kleinen Regel / vnd wie das alles zuverstehen sey / gründlicher Bericht gethan.

Zum Andern in der Hinderseyten des Astrolabij.

2.

Wird gehandelt im ersten Theil vom eussersten Limbo vnd dessen Inhalt/sampt den 12. Himlischen Zeichen vnd derselben Verstand.

Im andern Theil wird der Calendar sampt dessen Inhalt erkläret.

Vnd zum letzten / im dritten Theil / wird von der Scala Altimetra vnd derselbigen Auftheilung / vnd den gemeinen Teutschen / vnd Planeten oder Juden Stunden vnd derselben Verstand gründlicher Bericht beschrieben.

Zum Dritten / hab ich Unterricht gethan / wie man die abgedruckten Kupfferstücke des Astrolabij auff Holz ziehen / vnd das ander als das Rete vnd die beyde Regeln / dazu gehörig / zurichten / zusammen setzen vnd zum Gebrauch verfertigen soll.

Zum Vierdten / hab ich den Nutz vnd Gebrauch der Vorderseyten / welche mehrer theils auff das Firmament vnd des Himmels Lauff gerichtet ist / in 49. Capittel abgetheilet / vnd davon den Nutz vnd Gebrauch gründlich vnd deutlich genung beschrieben / wie folget.

In der